

Oberschenkelhalsbruch

owerschenklholsbruch
des word wemma soong muß
doo kennd ma si glodd
die zunga aa nu droo brechn
" oorsch huuch fraa Seifert"

dreizeha wochn liechi edsd scho doo
owerschenklholsbruch
und därf mi ned riehrn und
ned reeng und ned aufhoggn
"braung ma an schiewer fraa Seifert"

wohrscheinli kummi iewahabds nimmer auf die baa
und die soong ma ned die wohrad
owerschenklholsbruch
su gehds oo wenna aus werd
" hamma widder nix gessn fraa Seifert"

sie schaua ja za jeder besuchszeit nooch mir
ower mei gruuber hod die dooch
des werdla desdamend falln lossn
bluß a su maanda ma waß ja nie
" owerschenklholsbruch: heind widder amoll rüddgen fraa
Seifert"

ich liech und schdraaf mid meina gedänkn
iewa mei lebn wie iewa an oldn äbfl
UND WENNS KÖSTLICH GEWESEN IST
soochd der herr gronknhausboora
" owerschenklholsbruch fraa Seifert"

"oorsch nunder fraa Seifert"
" oorsch huuch fraa Seifert"
" zwaa drei wochn missma nuch geduld hoom"
und ich liech schdund fier schdund ohna schloof
die nochdschesder schdinkd barfimierr

owerschenklholsbruch
die blumma kumma naus za oombd
nemmd hald mei hämbfala leem aa mid
amoll ehrli: mehra is duch nimmer
" a schloofdabledla fraa Seifert"

iich kosd duch bluß der granknkass ihr geld
owerschenklholsbruch
fier a kaschberlasbubbn mid aanaochzich
is duch des allas zan fensda naugschmissn
" herr dogder wann därfi denn haam"